

周
易
義
叢

周易義叢卷之十一

三三

離下
震上 豐

序卦得其所歸者必大故受之以豐物所歸聚必成其
大故歸妹之後受之以豐也豐盛大之義爲卦震上離
下震動也離明也以明而動動而能明皆致豐之道明
足以照動足以亨然後能致豐大也

程傳

豐亨王假之勿憂宜日中

豐大也以明而動盛大之勢也故其占有亨道焉然王
者至此盛極當衰則又有憂道焉聖人以爲徒憂无益
但能守常不至於過盛則可矣故戒以勿憂宜日中也

周易義叢卷之十一
本義

○大而亨者王之所至豐之爲義闡弘微細通夫
隱滯者也爲天下之主而今微隱者不亨憂未已也故
至豐亨乃得勿憂也用夫豐亨勿憂之德宜處天中以
徧照者也故曰宜日中王輔嗣○勿无也王能至于豐
亨乃得无復憂慮用夫无憂之德然後可以君臨萬國
徧照四方如日中之時徧照天下故曰宜日中也孔穎

達○京氏傳曰豐自泰來九二往居六四變外體爲雷
六四來居九二變內體爲火故爲雷火豐以卦氣言之
泰正月辟卦豐六月卿卦離火至是極盛正大明中天
之時過六月則爲否故彖曰日中則昃月盈則食與泰

之爻辭无平不陂无往不復同義其旨皆原於文王宜

日中之敕戒云

卽顓

○王假之者聖人必假此豐盛之

時發號令行賞罰以至制禮作樂可以大行於天下也

胡且

○豐大之時所宜憂者不在乎日之未中而在乎

日之既中也明動不已未能保其大者也文王見夏之

有仲康殷之有小甲雍已故彖豐以爲後嗣戒若曰物

忌大盛明而益動必以過豐取損能保其豐者其惟中

乎荀大家

○豐爲盛大其義自亨極天下之光大者唯

王者能至之假至也天位之尊四海之富羣生之衆王道之大極豐之道其唯王者乎豐之時人民之繁庶事

物之殷盛治之豈易固爲可憂慮宜如日中之盛明廣
照无所不及然後无憂也

伊川

測曰序卦得其所歸者必大故歸妹之後受之以豐
由卦德言之以明而動此豐大之勢也由卦變言之
豐自泰來又豐大之時也故爲豐文王之世雖未至
於豐大也然而天下歸心焉又以明而動蓋已赫然
有豐大之勢逆知其嗣之必由泰以豐也故於豐之
卦繫以辭曰豐且亨矣王者假之盛極當衰則又有
憂道焉然徒憂无益勿憂也宜恒守其日中斯可矣
王者蓋謂守成之主也履時之豐正當日中之時誠

能恒斤斤焉以天下爲心行絜矩之道以用人理財
保守盛治藏其豐於天下而不敢以獨享其盛焉則
其豐宜可久也此寔王者祈天永命之道傳曰宜日
中宜照天下也亦謂此心宜常在天下云爾文王之
彖豐也蓋將預以爲後世戒也厥後成康果能守其
皇祖之訓恭儉禮下委任得人取於民有制雖至於
刑措四十餘年而天下益以豐泰可謂盛矣高陵呂
氏曰天地有消息者自然之常運宜日中者聖人以
人而勝天也

彖曰豐大也明以動故豐

以卦德釋卦名義

本義

○豐者盛大之義離明而震動

明動相資而成豐大也

伊川

王假之尚大也勿憂宜日中宜照天下也

釋卦辭

本義

○豐大也蓋闡大之大也大者王之所尚

故至之也以勿憂之德故宜照天下也

王輔嗣

○豐大

王者之本有也今言假之者不敢以豐大自處故言假

之尚大者宜於庶事皆守謙卑惟在照臨天下之際宜

尚此光大之德也勿憂者豐卦用宏大之德光被四表

若守其憂懼則其志齷齪失豐之體也

劉牧

○京氏傳

曰豐之爲卦本自泰來以卦氣言之泰正月辟卦豐六

月初旬大夫卦乾元之德至此亨達已盡故頌之以宜
日中照天下而又以日中則昃爲戒焉

郎顗

○王者有

四海之廣屯民之衆極天下之大也故豐大之道惟王
者能致之所有既大其保之治之之道亦當大也故王
者之所尚至大也所有既廣所治既衆當憂慮其不能
周及宜如日中之盛明普照天下無所不至則可勿憂
矣如是然後能保其豐大保有豐大豈小才小智之所
能也

伊川

日中則昃月盈則食天地盈虛與時消息而況於人乎况
於鬼神乎

此又發明卦辭外意言不可過中也

本義

○豐之爲用

困於彛食者也施於未足則尚豐施於已盈則方溢不可以爲常故具陳消息之道

王輔嗣

○盛必有衰自然

常理日中至盛過中則昃月滿則盈過盈則食天之寒暑徃來地之陵谷遷貿盈則與時而息虛則與時而消天地日月尚不能久況於人與鬼神而能長保其盈盛乎勉令及時修德仍戒居存慮亡也

孔穎達

○既言豐

盛之至復言其難常以爲誠也日中盛極則當昃月既盈滿則有虧缺天地盈虛尚與時消息況人與鬼神乎鬼神謂造化之迹於萬物盛衰可見其消息也於豐

盛之時而爲此誠欲其守中不至過盛處豐之道豈易也哉

伊川

象曰雷電皆至豐君子以折獄致刑

取其威照並行之象

本義

○文明以動不失情理也

王

輔嗣

○雷者天之威動電者天之光耀雷電俱至則威

明備足以爲豐也君子法象天威而用刑罰亦當文明以動斷決獄訟須得虛實之情致用刑罰必得輕重之中若動而不明則滯濫斯及故君子象於此卦而折獄用刑

孔穎達

○象其威明之義取不失其情又有斷也

石介

○雷電皆至明震並行也二體相合故云皆至明

動相資成豐之象離明也照察之象震動也威斷之象
折獄者必照其情實唯明克允致刑者以威於姦惡惟
斷乃成故君子觀雷電明動之象以折獄致刑也

伊川

○電明照也所以折獄雷威怒也所以致刑

朱震

測曰折獄致刑者何曰至治之時人多怙惡大亨之
日民興惰心折獄致刑如雷電之皆至也豐其可保
乎

初九遇其配主雖旬无咎往有尚象曰雖旬无咎過旬災
也

配主謂四旬均也謂皆陽也當豐之時明動相資故初

九之遇九四雖皆陽剛而其占如此也象戒占者不可

求勝其配亦爻辭外意

本義

○處豐之初其配在四以

陽適陽以明之動能相光大者也旬均也雖均无咎往
有尚也初四俱陽爻故曰均也

王輔嗣

○无咎而往有

嘉尚也勢若不均則相傾奪既相傾奪則爭競乃興而

相違背災咎生焉故象曰過旬災也

孔穎達

○明方動

進而速有功也遲而過旬失其動也災之道矣

子夏傳

○旬數之極也猶日之中也言无咎者謂初未至中猶

可進也若進而過中則災故象稱過旬災也爻辭不言

豐者謂初未至豐往有尚言其進至豐也

劉牧

○雷電

皆至成豐之象明動相資致豐之道非明无以照非動
无以行相須猶形影相資猶表裏初九明之初九四動
之初宜相須以成其用故雖旬而相應位則相應用則
相資故初謂四爲配主已所配也配雖匹稱然就之者
也如配天以配君子故初於四云配四於初云夷也雖
旬无咎旬均也天下之相配者常非均敵如陰之應陽
柔之從剛下之附上敵則安肯相從唯豐之初四其用
則相資其應則相成故雖均是陽剛相從而无過咎也
蓋非明則動无所之非動則明无所用相資而成用同
舟則胡越一心共難則仇怨協力事勢使然也往而相

從則能成其豐故云有尚有可嘉尚也

伊川

○過則偏

勝之患生是以有災

立行可

六二豐其蔀日中見斗往得疑疾有孚發若吉象曰有孚發若信以發志也

六二居豐之時爲離之王至明者也而上應六五之柔暗故爲豐蔀見斗之象蔀障蔽也大其障蔽故日中而昏也往而從之則昏暗之主必反見疑唯在積其誠意以感發之則吉戒占者宜如是也虛中有孚之象

本義

○蔀覆曖障光明之物也處明動之時不能自豐以光大之德既處乎內而又以陰居陰所豐在蔀幽而无覩

者也故曰豐其蔀日中見斗日中者明之盛也見斗者闇之極也處盛明而豐其蔀故曰日中見斗不能自發故往得疑疾然履中當位處闇不邪有孚者也若辭也有孚可以發其志不因於闇故獲吉也

王輔嗣

○六二

在離體居中得正此日中之象與卦辭宜日中同而乃豐其蔀至於見斗何也以遇六五爲柔稚乘剛之主故往則反得疑疾也然離有中孚之象故能以信發志終獲其吉此正周公自言已事也成王以流言而疑公蓋日中見斗之象周公居東既積其誠意形諸鴟鴞之詩成王又感風雷之變始悟而迎公斯有孚發若之驗云

九家

○六二處下而在內以陰居陰如部屋幽暗不見知於人也故徃得疑疾君子居中守正久幽不變人將信之然後可以發其部而行其志也

司馬君實

○部

蔽也謂君之明臣下障蔽之故曰豐其部日君之象斗臣之象今日中之時而見斗是臣之威明侵於君也且五不當位而二當位是僭也五不顯明而四顯明是專也二與四五有僭專之咎故爻辭同也徃得疑疾者更徃則益疑君之嫌必掇所患若能以信發明其志使不疑於已則吉矣

劉牧

○明動相資乃能成豐二爲明之

主又得中正可謂明者也而五在正應之地陰柔不正

非能動者既其應之才不足資則獨明不能成豐既不
能成豐則喪其明功故爲豐其部日中見斗斗昏見者
也部周匝之義用障蔽之物掩晦其明者也斗屬陰而
主運乎象五以陰柔而當君位日中盛明之時乃見斗
猶豐大之時乃遇柔弱之主則明喪而暗矣二雖至明
中正之才所遇乃柔暗不正之君既不能下求於己若
往求之則反得猜疑忌疾此暗主之常也然則如之何
而可惟盡其至誠以感發其志意而已苟誠意能動則
雖昏蒙可開也雖柔弱可輔也雖不正可正也古人之
事庸君常主而克行其道者管仲之相桓公孔明之輔

後主是已故爲吉也

伊川

九三豐其沛日中見沫折其右肱无咎象曰豐其沛不可大事也折其右肱終不可用也

沛一作施謂幡幔也其蔽甚於部矣沫小星也三處明極而應上六雖不可用而非咎也故其象占如此

本義

○沛幡幔所以禦盛光也沫微昧之明也應在上六志在乎陰雖愈乎以陰處陰亦未足以免於闇也所豐在沛日中則見沫之謂也施明則見昧而已施用則折其右肱故可以自守而已未足用也

王輔嗣

○日在雲下爲

沛沫小星也

虞仲翔

○沛一作蒂枝葉偏垂之貌偏盛也

沫者斗繫謂斗之輔星三以陽得正而上應於上下比
於二日中見沫之象斗以象大臣繫以象家臣家臣秉
政志在偏私故不可大事折右肱使不得終竟用事者
故无咎矣

陸續

○九三以陽居陽又過其中亦是大臣

剛亢者沛如水之沛然不可禦亦過盛之義沫微昧之
象臣既過盛是微沫其君者右陰也今是陰盛若能折
去其右肱亦可无咎蓋極盛之臣終不可用也肱亦股
肱大臣之義

石介

○九三遇豐之時有大事之材可以

豐其沛者也上六以幽闇爲之主不可與有爲故曰折
其右肱无咎

王介甫

○沛者驟明之謂見沫幽闇之謂右

者位之陰肱者身之輔九三以陽處陽豐之驟也應在

上六明而闇也應在幽昧故若折其肱焉

鮮于

○豐而

過盛不能自明災及其身又誰咎焉

張簡

○沛字古本

有作沛字者王弼以爲幡幔則是沛也幡幔圍蔽於內者豐其沛其暗更甚於部也三明體而反暗於四者所應陰暗故也豐之道必明動相資而成三應於上上陰柔又无位而處震之終既終則止矣不能動也三无上之應則不能成豐沫星之微小无名數者見沫暗之甚也豐之時而遇上六日中而見沫者也右肱人之所用乃折矣其无能爲可知賢智之才遇明君則能有爲於

天下上无可賴之主則不能有爲如人之折右肱也人之爲有所失則有所歸咎若欲動而无右肱欲爲而上无所賴則不能而已更復何言无所歸咎也

伊川

九四豐其蔀日中見斗遇其夷主吉象曰豐其蔀位不當也日中見斗幽不明也遇其夷主吉行也

象與六二同夷等夷也謂初九也其占爲當豐而遇暗主下就同德則吉也

本義

○以陽居陰豐其蔀也得初

以發夷主吉也

王輔嗣

○九四以陽居陰闇同六二故曰

豐其蔀夷平也四應在初而同是陽爻能相顯發而得其吉故曰遇其夷主吉言四之與初交相爲主者若賓

主之義也若據初適四則以四為主故曰遇其配主自
四之初則以初為主故曰遇其夷主也二陽體敵兩主
均平故初謂四爲旬而四謂初爲夷也

孔穎達

○四雖不

當位然而僭逼上體明揜於君亦有疑君之象故與二
同爻辭初炎上四又動應之故得發其光明斯爲一卦

等夷之主

劉牧

○四承六五之柔遇其夷易之主雖幽

晦而遇夷主是以志行而吉也

石介

○四雖陽剛爲動

之主又得大臣之位然以不中正遇陰暗柔弱之主豈
能致豐大也故爲豐其蔀日中見斗當盛明之時反昏
暗也夷主其等夷也相應故謂之主初四皆陽而居初

是其德同又居相應之地故爲夷主居大臣之位而得在下之賢同德相輔故吉也然欲致天下之豐有君而後能也五陰柔居尊而震體无虛中巽順下賢之象下雖多賢亦將何爲蓋非陽剛中正不能致天下之豐也伊川
六五來章有慶譽吉象曰六五之吉有慶也

質雖柔暗若能來致天下之明則有慶譽而吉矣蓋因其柔暗而設此以開之占者能如是則如其占矣本義

○以陰之質來適尊陽之位能自光大章顯其德獲慶

譽也

王輔嗣

○來章謂乘四之明四來章明於已也處豐

柔謙不自光大吉其宜矣

劉牧

○五屈體下四四之明

上行之五相錯成離坤離成文章者文成也九四上行則初應四二應五三應上六爻並用成豐大之慶五屈體以下賢四志在應乎上人自譽之兌爲口譽之者也

五得正吉也

朱震

○五以陰柔之才爲豐之主固不能

成其豐大若能來致在下章美之才而用之則有福慶復得美譽所謂吉也六二文明中正章美之才也爲五者誠能致之在位而委任之可以致豐大之慶名譽之美故吉也章美之才主二而言然初與三四皆陽剛之才五能用賢則彙征矣然六五无虛已下賢之義聖人設此義以爲教耳

伊川

上六豐其屋蔀其家闐其戶聞其无人三歲不覲凶象曰
其屋天際翔也闐其戶聞其无人自藏也

以陰柔居豐極處動終明極而反暗者也故爲豐大其
屋而反以自蔽之象无人不覲亦言障蔽之深其凶甚
矣象云藏謂障蔽也

本義

○屋藏蔭之物以陰處極而

最在外不履於位深自幽隱絕迹深藏者也既豐其屋
又蔀其家屋厚家覆闇之甚也雖闐其戶聞其无人棄
其所處而自深藏也處於明動尚大之時而深自幽隱
以高其行大道既濟而猶不見隱不爲賢更爲反道凶
其宜也三年豐道之成治道未濟隱猶可也既濟而隱

是以治爲亂者也

王輔嗣

○屋於室爲外。家於國爲私。上

六窮於極大。行失其中。但豐於其外。節於所私。窮大者

必失其居。削國以益家。天人所不祐。本欲豐屋節家。反

窺戶而無人。天人之際。嚴且詳矣。

陸希聲

○飛鳥遺之音

謂宜下而反上。豐之志皆欲顯其居。今空其內而无所

托。故愧於時而反自藏也。

劉牧

○始顯大如飛鳥之於

天際而飛翔終自然。必退藏而无所覲。皆聖人戒其過

盛。楊子雲曰。炎炎者滅。隆隆者絕。觀雷觀火。爲盈爲實。

天收其聲。地藏其熱。高明之家。鬼瞰其室。正合此義。

石介

○上六翔於天際。自以爲明之主也。而其闇足以自蔽。

其身故曰豐其屋蔀其家九三折其右肱而莫爲之用
豈真无人哉。畏我而自藏也。三歲不覲其自以爲明者
窮矣。故凶。

東坡

○六以陰柔之質而居豐之極處動之
終其滿假躁動甚矣。處豐大之時宜乎謙屈而處極高
致豐大之功在乎剛健而體陰柔。當豐大之任在乎得
時而不當位如上六者處无一當其凶可知。豐其屋處
太高也。蔀其家居不明也。以陰柔居豐大而在无位之
地乃高亢昏瞶自絕於人。人誰與之。故闕其戶闔其无
人也。至於三歲之久而不知變其凶宜矣。不覲謂尚不
見人。蓋不變也。六居卦終有變之義而不能遷是其才

不能也

伊川

測曰豐六爻象辭周公特以已與成王之時事言之
各有所指初與四以位相應者也天下之相應者常
非均敵今初之與四均是陽剛兩貴不相事兩賢或
相阨而占曰无咎何也蓋當豐之時明動相資是則
初九之遇其配主也雖其勢分才力兩不相下而德
則相成故不惟无咎而其行有尚若周公之於召公
是已六二爲離之主本至明者也而上應六五爲陰
邪所蔽使其至明之德抑而不伸不得以達于外與
明夷之義畧同故爲豐部見斗之象當是時六二若


卷之三

七

不度其勢必欲行已之志則五反見疑忌矣惟積其誠意以感發之則可以回其惑而開其蔽耳故曰往得疑疾有孚發若吉成王以流言而疑周公此日中見斗之時也公居東三年積其誠意上感風雷之變然後王悟而迎公此有孚發若之驗也九三明之極者上六暗之極者也我雖極明而所應者極暗則我之明反爲暗之所傷有豐其沛日中見沫之象比之見斗抑又甚焉以周公之聞望而爲三監之讒邪所蔽上下致疑正其象也周召同心輔政分治東西周爲二伯有左右股肱之義今既避而居東是折其右

肱也然於義則无咎詩云公孫碩膚德音不瑕此之
謂也九四象與六二同六二以離明之德上應六五
九四以剛明之德上比六五皆爲上六所蔽故同爲
豐蔀見斗之象然四與初同德又居相應之地謂之
夷主如四之才得偕夷主與之共事則可以撤其蔀
而爲豐矣故曰遇其夷主吉昔者文王之得太公望
召公之得周公與之明勗偶王正其象也吉可知已
六五質雖柔暗然爲豐之主當明以動者也六二以
文明之才居相應之地爲五者苟能致其虛中之誠
以來之則有福慶復得美譽所謂吉也此成王既悟

始迎周公以歸誕保文武受命作周孚先之事也上六以陰柔居豐極而在无位之地乃高亢自絕於人誰與之故有聞其无人三歲不覲之凶其殷受及三監之象也乎



艮下
離上旅

序卦豐大也窮大者必失其居故受之以旅豐盛至於窮極則必失其所安旅所以次豐也爲卦離上艮下山止而不遷火行而不居違去而不處之象故爲旅也又麗乎外亦旅之象

程傳

○入而麗乎內所以爲家人出

而麗乎外所以爲旅

王介甫

○旅非商賈之謂凡客於外

者皆是也天子有天子之旅天王出居于鄭是也諸侯有諸侯之旅公在楚是也大夫有大夫之旅崔子之去他邦是也聖賢有聖賢之旅孔子之轍環孟子之歷聘是也旅豈一槩哉

吳應回

旅小亨旅貞吉

旅羈旅也山止於下火炎於上爲去其所止而不處之象故爲旅以六五得中於外而順乎上下之二陽艮止而離麗於明故其占可以小亨而能守其旅之貞則吉旅非常居若可苟者然道无不在故自有其正不可須臾離也

本義

○不足全夫貞吉之道唯足以爲旅之貞

吉故特重曰旅貞吉也

王輔嗣

○旅者客寄之名羈旅之

稱失其本居而寄他方謂之爲旅既爲羈旅苟求僅存

雖得自通非甚光大故旅之爲義小亨而已故曰旅小

亨羈旅而獲小亨是旅之正吉故曰旅貞吉

孔穎達

○京

氏傳曰旅自否來六四九五互變成旅以卦氣言之否

七月辟卦旅四月大夫卦以乾爲辟以一柔麗乎乾之

中爻而順乎上下之二陽有天王出居于外諸侯寄公

之象故其卦辭曰小亨旅貞吉

郎顗

○旅者羈旅之稱

自天子公侯聖賢以及凡民靡不有之昔者禹以治水

八年在外天王狩于河陽文王囚于羑里而散宜生之

徒皆在旅次周公居東三年孔子周流列國皆爲羈旅

故卦辭爻象彖傳大率自言已事爲多爻象下三爻以

商賈言周誥肇牽車遠服賈其得貞災厲靡有出於象

辭之外者上三爻則周公自言已事云荀九○身寄他

國親戚輔之者少故其道不得盛行其志不得大通但

不失爲旅之正則吉胡翼○卦辭以卦才言也如卦之

才可以小亨得旅之真正而吉也伊川○山止而不動

旅縮象火動而不止旅人象豐爲大則旅爲小在旅而

亨亨之小者也然事有大小道无不在大亨固利於貞

慎不可以旅亨之小而失其貞也故特再提旅字而曰

旅貞吉

劉曄

測曰旅羈旅也止而麗乎外旅之義也火去其所止
不處旅之象也凡客于外者皆是故惟天子无旅自
餘若諸侯之有寄公大夫之去在他邦皆旅也即在
聖賢若文王之拘幽周公之居東孔子之周流列國
亦旅也以卦變言之旅自否來三往居五以柔得中
乎外而順乎上下之剛則所爲主者與其所主者宜
皆合矣以卦德言之內既靜專而外又灼夫物情止
而麗乎明故旅有亨之道焉凡人之處旅也本无大
亨之理旅而曰亨雖大亦小也故其占爲小亨所貴

者守貞則吉何謂旅貞柔得中乎外而順乎剛止而麗乎明即旅之正道也但能守乎此則吉可知已是故止於柔順麗乎文明此文王之所以處旅也赤舄几几德音不瑕此周公之所以處旅也以至孔子之進以禮退以義當阨主司城貞子爲陳侯周臣豈非旅之所謂亨且吉邪

彖曰旅小亨柔得中乎外而順乎剛止而麗乎明是以小亨旅貞吉也

以卦體卦德釋卦辭

本義

○夫物失其主則散柔乘於剛則乖既乖且散物皆羈旅何由得小亨而貞吉乎夫

陽爲物長而陰皆順陽唯六五乘剛而復得中乎外以承于上陰各順陽不爲乖逆止而麗明動不履妄雖不及剛得尊位恢弘大道足以小亨今附旅者不失其正

得其所安也

王輔嗣

○京氏傳云旅自否來以卦氣言

之否七月辟卦旅四月侯卦在夬之次比之前有旅之象以周事言之此六州辟君會于孟津之象也

郎顗

○

寄旅之不失其中常人之所難能故仲尼至聖栖栖旅於人至是邦也必聞其政是以能溫良恭儉讓而得也

石介

○艮止乎下也離麗乎外也止而麗乎外旅也柔

得中乎外而順乎剛止而麗乎明不足以有爲非所謂

大亨也

王逢

○六上居五柔得中乎外也麗乎上下之

剛順乎剛也下艮止上離麗止而麗於明也柔順而得
在外之中所止能麗於明是以小亨得旅之貞正而吉
也旅困之時非陽剛中正有助於下不能致大亨也所
謂得在外之中中非一揆旅有旅之中也止麗於明則
不失時宜然後得處旅之道

伊川

○一柔在外而處二

剛之中是羈旅之人交於強有力者苟非善處卑則處
辱高則招禍鮮不失矣惟於止知其所止无私交无暗
事非賢不主非善不與止而麗乎明也夫如是內不失
已外不失人雖在旅困亦可小亨得之於正而吉也

徐幾

旅之時義大矣哉

旅之時爲難處

本義

○旅者大散物皆失其所居之時

也咸失其居物願所附豈非智者有爲之時哉

王輔嗣

○天下之事當隨時各適其宜而旅爲難處故稱其時

義之大

伊川

○適旅之時動得其宜其義大矣

李元量

象曰山上有火旅君子以明慎用刑而不留獄

慎刑如山不留如火

本義

○止以明之刑戮詳也

王輔嗣

○火在山上逐草而行勢不久留故爲旅象又上下二

體艮止離明故君子象此以靜止明察審慎用刑而不

稽留獄訟

孔穎達

○火之在高明无不照君子觀明照

之象則以明慎用刑明不可用故戒於慎明而止亦慎

象觀火行不處之象則不留獄獄者不得已而設民有

罪而入豈可留滯淹久也

伊川

○君子觀象而用刑則

取其火以爲明取其山以爲慎取其旅以不留獄

毛伯玉

○火不可使久處於山猶囚徒不可久留於獄也

丘行可

大象明慎用刑不留獄者何胡炳文曰明如火慎如

山不留獄如山之不留火也

初六旅瑣瑣斯其所取災象曰旅瑣瑣志窮災也

當旅之時以陰柔居下位故其象占如此

本義

○瑣瑣

細小卑賤之貌初六當旅之時最處下極是寄旅不得

安而爲斯卑賤之役然則爲斯卑賤勞役由其處於窮
下故致此災故曰旅瑣瑣斯其所取災象云志窮災在
志意窮困自取此災也 孔穎達 ○柔順太過爲卑賤動

其心苟容苟合其道不通其志困窮是以取災 胡旦 ○

六以陰柔在旅之時處於卑下是柔弱之人處旅困而
在卑賤所存污下者也志卑之人既處旅困鄙猥瑣細
无所不至乃其所以致悔辱取災咎也瑣瑣猥細之狀
當旅困之時才質如是上雖有援无能爲也四陽性而
體離亦非就下者也又在旅與他卦居大臣之位者異
矣 伊川 ○旅下卦三爻皆以允旅者言初處最下其道

途負販之旅乎魯丙氏貰貸行賈徧郡國娥瑣特甚自
其父兄與弟子約俯有拾仰有取鄒魯以其故多去文
學而趨利于時人皆鄙賤之宛孔氏自大梁遷南陽大
鼓鑄規陂田連騎遊諸侯有游閒公子之名然其贏得
過當愈於娥瑣故南陽行賈盡法孔氏之雍容若丙氏
者其瑣瑣志窮而取災者乎

朱震

○詩云瑣兮尾兮流

離之子初六有焉

張清子

六二旅即次懷其資得童僕貞象曰得童僕貞終无尤也
即次則安懷資則裕得其童僕之貞信則无欺而有賴
旅之最吉者也二有柔順中正之德故其象占如此

本義

○次者可以安行旅之地也懷來也得位居中體柔奉上以此寄旅必獲次舍懷來資貨得童僕之所正也旅不可以處盛故其美盡於童僕之正過斯以往則見害矣童僕之正義足而已

王輔嗣

○以陰居二即就其舍

承陽有實故懷其資初者卑賤二得履之故得童僕處和得位故正也

荀九家

○資謂財也上承於三得安其

位不敢自顯其才用惟以卑順爲心是得童僕之正固非君子之正也羈旅而卑順故終无尤

陸希聲

○六二

居得其旅而即其次舍資財也得位居中是內懷資財之人爲旅之道不能歸服於衆雖居中正但能得資

以爲使令是其正也

石介

○履柔得位止滯无應懷

戀資貨以附不正故曰旅即次懷其資不能任中以求

自奮在童僕則得正无尤非君子有爲之道

薛瑄

○二有

柔順中正之德柔順則衆與之中正則處不失當故能
保其所有童僕亦盡其忠信雖不若五有文明之德上
下之助亦處旅之善者也次舍旅所安也財貨旅所資
也童僕旅所賴也得就次舍懷蓄其資財又得童僕之
貞良旅之善也柔弱在下者童也強壯處外者僕也二
柔順中正故得内外之心在旅所親比者童僕也不云
吉者旅寓之際得免於災厲則已善矣

伊川

○次旅之

居也資旅之用也童僕旅之役走者也旅即次則其所
舍也有其居懷其資則其所蓄也有其用得童僕則其
所以奔走而服役也又有人旅道何修而得此哉蓋
以六居二之爲正故也 王景孟

九三旅焚其次喪其童僕貞厲象曰旅焚其次亦以傷矣
以旅與下其義喪也

過剛不中居下之上故其象占如此喪其童僕則不止
於失其心矣故貞字連下句爲義象言以旅之時而與
下之道如此義當喪也 本義 ○居下體之上與二相得
以寄旅之身而爲施下之道與萌侵權主之所疑也故

次焚僕喪而身危也

王輔嗣

○與二相得不能守正而

反通於下斯失旅之義故次焚也童僕主人之所使也
失於主矣次其亡矣何保於童僕故喪其所親而危及
之

子夏傳

○處旅之道以柔順謙下爲先三剛而不中

又居下體之上艮體而居上有自高之象在旅而過剛
自高致困災之道也自高則不順於上故上不與而焚
其次失所安也上離爲焚象過剛則暴下故下離而喪
其童僕之貞信謂失其心也如此則危厲之道也

伊川

○居剛而用剛平時猶不可况旅乎以此與下焚次喪
僕固其宜也九三以剛居下體之上則焚次上九以剛

居上體之上則焚巢位愈高剛愈亢則禍愈深矣潘夢旂

九四旅于處得其資斧我心不快象曰旅于處未得位也
得其資斧心未快也

以陽居陰處上之下用柔能下故其象占如此然非其
正位又上无剛陽之與下唯陰柔之應故其心有所不
快也本義○斧所以斫除荆棘以安其舍者也雖處上

體之下不先於物然而不得其位不獲平坦之地客于
所處不得其次而得其資斧之具故其心不快也王輔嗣

○四居近君之地有陽明之德而乃旅于處焉未得位
也此正周公居東之象雖得兵資征伐之權罪人斯得

而管蔡與焉此所以心未快也荀九家○以陽居陰志

在謙下得旅之宜故旅于處也有應在初而上比於五

上下未快必資於斧以斷也體性炎上卒承於五斷得

所取初爲正應而懼不與以陽下陰亦非本志故其心

不快也陸希聲○匹體陽明有求也性剛直有斷也非

正位而不獲其次未爲亨也且旅而雖有才斷志不得

行故曰我心不快也明寄旅純任卑巽今四雖能謙下

然而體性猶剛未得安於童僕之貞矣是于旅之宜未

盡善也劉牧○九四居陰不得行而處者也有剛動能

斷之志焉故能安其不可爲之時而樂之者也故心不

快此智者之旅也

王介甫

○四陽剛雖不居中而處柔

在上體之下有用柔能下之象得旅之宜也以剛明之才爲五所與爲初所應在旅之善者也然四非正位雖得其處止不若二之就次舍也有剛明之才爲上下所與乃旅而得貨財之資器用之利也雖在旅爲善然上无剛陽之與下唯陰柔之應故不能伸其才行其志其心不快也云我者據四而言

伊川

六五射雉一矢亡終以譽命象曰終以譽命上逮也

雉文明之物離之象也六五柔順文明又得中道爲離之主故得此爻者爲射雉之象雖不无亡矢之費而所

喪不多終有譽命也象云上逮言其譽命聞于上也

義本

○射雉以一矢而復亡之明雖有雉終不可得矣寄旅而進雖處于文明之中居于貴位此位終不可有也以其能知禍福之萌不安其處以乘於下而上承於上故終以譽而見命也

王輔嗣

○九五若文王出羑里而伐

密伐崇雖費鉤援臨衝之師而四方攸同周公居東三年而罪人斯得雖有破斧缺斨之勞而四國是皇正其義也

荀九家

○雉文明離象矢專直之象射者司中之

謂處羈旅之時皆失所欲以專直之道期中文明之位此必不可得者故曰射雉一矢亡言亡雉也不下據四

而仰承於上下交歸故終以譽命命猶名也言雖不得位之實而終有名譽之美也尼父之旅近之

陸震

○

上能逮及於已蓋已能承順於人也

石介

○六五所謂

柔得中乎外而順乎剛者也雖有柔順中正之德知其親比者寡未嘗固必其所求若但以一矢射雉其得失未可知雖一射至於亡矢亦終有令美之譽然爲上九所信尊顯之命及之也

胡旦

○六五有文明柔順之德

處得中道而上下與之處旅之至善者也人之處旅能合文明之道可謂善矣羈旅之人動而或失則困辱隨之動而无失然後爲善離爲雉文明之物射雉謂取則

於文明之道而必合如射雉一矢而亡之發无不中則終能致譽命也舉令聞也命福祿也五居文明之位有文明之德故動必中文明之道也五君位人君无旅旅則失位故不取君義

伊川

上九鳥焚其巢旅人先笑後號咷喪牛于易凶

象曰旅在上其義焚也喪牛于易終喪之凶也
上九過剛處旅之上離之極驕而不順凶之道也故其

象占如此

本義

○居高危而以為宅巢之謂也寓旅得

上位故先笑也以旅而處于上極衆之所疾也以不親之身而當被害之地必凶之道也故曰後號咷牛者稼穡之資以旅處上衆所同嫉故喪牛于易不在於難物

莫之與危而不扶喪牛于易終莫之聞莫之聞則傷之

道至矣

王輔嗣

○象之終莫之聞者衆所同疾終无

言以告之使聞而悟也

孔穎達

○牛順物也旅之爲道

全於順也剛而亢居喪其順也旅者人之所容剛而无

順人何容哉故喪於无難凶其宜矣

子夏傳

○上九正

三監自焚之象

荀九家

○鳥飛騰處高者也上九剛不

中而處最高又離體其亢可知故取鳥象在旅之時謙

降柔和乃可自保而過剛自高失其所宜安矣巢鳥所

安止焚其巢失其所安无所止也在離上爲焚象陽剛

自處於至高始快其意故先笑既而失安莫與故號咷

輕易以喪其順德所以凶也牛順物喪牛于易謂忽易以失其順也離火性上爲躁易之象

伊川

○三與上應

皆以剛居上无相與之情故三焚其次上焚其巢三承九四之離爲他人所焚也上焚其巢自焚也三焚其次則巢尚在也喪其童僕則牛尚存也巢在則有可歸之理牛存則有可行之資今也巢焚牛喪欲歸則无其所欲行則无其資凶斯致矣

林栗

測曰旅下卦三爻皆以九旅者言上卦三爻皆周公自言已事也初六以陰柔居下位旅之志意卑下而規模局促者也如此則誰其與之故曰斯其所取災

蓋人必自輕而後人輕之曰斯其所取災明其爲瑣
瑣之所致而非自外來也六二柔順中正其德全故
象占三善具全夫柔順則衆與之中正則處不失當
旅之德靡有不全曰即次則其居安曰懷資則其財
裕曰童僕貞則其所輔翼者皆无欺而有賴九旅中
好事要不出此三者此旅之最吉者也九三過剛則
衆莫之與不中則所處未免失當居下之上則不能
下人故自致困災而有焚其次喪其童僕之象危可
知已九四近君在大臣之位有用柔能下之德而乃
旅于處焉雖爲五所與爲初所應得其資斧將焉用之

故其心有所不快也此正周公居東之象觀大誥之
辭與鴟鶚之詩則公之不快于心可想見矣六五以
柔順爲文明之主處得中道而上下與之故爲射雉
之象雖一矢亡而可以播德譽受天命在人之上非
復爲旅矣此爻由卦變來故有變旅之象若文王出
羑里而伐崇雖費鉤援臨衝之師而四方攸同周公
居東三年而罪人斯得雖有破斧缺斨之勞而四國
是皇是其義也上九以過剛處最高之地驕而不順
正三監自焚之象故曰鳥焚其巢離爲飛鳥在離之
上有火象旅人先笑後號咷正如鳥焚其巢不得所

安也喪牛于易者驕泰以失之也凶可知已

䷵

巽下巽
巽上巽

序卦旅而无所容故受之以巽巽者入也羈旅親寡非
巽順何所取容苟能巽順雖旅困之中何往而不能入
巽所以次旅也爲卦一陰在二陽之下巽順於陽所以
爲巽也

程傳

巽小亨利有攸往利見大人

巽入也一陰伏於二陽之下其性能巽以入也其象爲
風亦取入義陰爲主故其占爲小亨以陰從陽故又利
有所往然必知所從乃得其正故又曰利見大人也

義本

○全以巽爲德是以小亨也上下皆巽不違其令命乃行也故申命行事之時上下不可以不巽也利有攸往者巽悌以行物无距也利見大人者大人用之道愈隆也

王輔嗣

○巽者卑順之名說卦云巽入也蓋以巽是

象風之卦風行无所不容故以入爲訓若施之於人事能自卑巽者亦无所不容然巽之爲義以卑順爲體以容入爲用故受巽名矣上下皆巽不爲違逆君唱臣和教令乃行故於重巽之卦以明申命之理雖上下皆巽命令可行然全用卑巽則所通非大故曰小亨巽悌以行物无違距故曰利有攸往但能用巽者皆无往不利

然大人用巽其道愈隆故曰利見大人明上下皆須用

巽也

孔穎達

○六四得位爲羣陽之主全以柔巽之德

非君子之道故小亨而已柔巽則无所距唯見大人乃不陷於邪德得所巽之道也

陸績

○卦之才可以小亨

利有攸往利見大人也巽與兌皆剛中正巽說

兌一作義

亦相類而兌則亨巽乃小亨者兌陽之爲也巽陰之爲

也兌柔在外用柔也巽柔在內性柔也巽之亨所以小

也

伊川

○小謂初四二陰也順則能亨故曰小亨而利

有攸往者剛得中也大人者二五也利見之者則初與

四也

張清子

測曰震艮以剛勝巽兌以柔勝巽柔在內體柔也兌
柔在外用柔也故兌之勝見而巽之勝隱巽一柔伏
於陽剛之下其性務入又其象爲風風之入物也以
氣亦猶言語命令之能入人也傳曰重巽以申命與
論語爲命之命同蓋上之誥乎下若誓誥文命臣之
告乎君若謨訓代言皆命也傳又曰剛巽中正而志
行此以卦體言指二五能以剛德順乎中正之道而
其志得行也蓋君主命令於上臣主出納於下必皆
順乎大中至正之道而後乃出命焉故其志得行惟
其以言入人也故其占曰小亨然以中正爲命而柔

皆順之則其下无有弗信而從者矣故利有攸往且
二五皆以剛中正當君臣之位有大人之象此正下
之所當順從者也故又曰利見大人云

彖曰重巽以申命

釋卦義也巽順而入必究乎下命令之象重巽故爲申

命也

本義

○重巽以申命令乃行也未有不巽而命行

也

王輔嗣

○上巽能接下下巽能奉上上下皆巽命乃

得行

正義

○重巽者上下皆巽也上順道以出命下奉

命而順從上下皆順重巽之道也又重爲重複之義君
子體重巽之義以申復其命令申重複也丁寧之謂也

剛巽乎中正而志行柔皆順乎剛是以小亨利有攸往利見大人

以卦體釋卦辭剛巽乎中正而志行指九五柔謂初四

本義

○以剛而能用巽不失于中正物所與也柔皆順

乎剛明无違距故得小亨

王輔嗣

○雖上下皆巽若命

不可從則物所不與也故又因二五之爻剛而能巽而不失其中所以志意得行申其命令也柔皆順乎剛者剛雖巽爲中正柔若不順乎剛何以申其命乎故又就初四各處卦下柔皆順剛无所違逆所以教命得申成

小亨以下之義也

孔頴達

○巽爲命令重命令者欲丁

寧也二得中五得正體兩巽故曰剛巽乎中正皆撓陰故志行陰爲卦主故小亨

陸績

○蠱所以得元亨者以

其巽而能止也巽所以惟小亨者以其巽而无所止也且夫巽過而欲齊之必至於用刑故蠱言先甲三日巽言先庚三日甲主仁庚主刑也夫齊之以刑必首導之以德故蠱爲元亨巽爲小亨

劉牧

○柔在下而承二剛

巽也內巽者命之始外巽者巽而達乎外申前之命也

九二之剛巽乎中九五之剛巽乎中正巽乎中正則其剛不過而所施當乎人心是以志行乎上下九二之剛

巽乎中則初六之柔順之九五之剛巽乎中正則六四之柔順之上下之柔皆順乎剛則物无違者而九二九五之志行九五巽乎中正而柔順之則柔者亦得其正而小者亨矣豈非小者之利乎故六四利有攸往利見大人而其道上行故曰是以小亨利有攸往利見大人

朱震

○剛巽柔順以卦才言也陽剛居巽而得中正巽

順於中正之道也陽性上其志在以中正之道上行也又上下之柔皆巽順於剛其才如是雖內柔可以小亨也巽順之道无往而不能入故利有攸往巽順雖善道必知所從能巽順於陽剛中正之大人則爲利故利見

大人也如五二之陽剛中正大人也巽順不於大人未

必不爲過也

伊川

象曰隨風巽君子以申命行事

隨相繼之義

本義

○隨風巽者兩風相隨故爲隨風風

既相隨物无不順君子以申命行事者風之隨至非是

令初故君子則之以申命行事也

孔穎達

○法教百端

令行爲上貴其必從故曰行事也

荀爽

○古之爲命也

必反復申明之然後事必行

東坡

○兩風相重隨風也

隨相繼之義君子觀重巽相繼以順之象而以申命令

行政事隨與重上下皆順也上順下而出之下順上而

從之上下皆順重巽之義也命令政事順理則合民心而民順從矣

伊川

測曰大象以申命行事者何曰其所以鼓舞漸磨而入人者深矣是以君子貴有中正之德也不然雖令不從矣

初六進退利武人之貞象曰進退志疑也利武人之貞志治也

初以陰居下爲巽之主卑巽之過故爲進退不果之象若以武人之貞處之則有以濟其所不及而得所宜矣

本義

○處令之初未能服令者也故進退也成命齊邪

周易卷之二十一
莫善武人故利武人之貞以整之

王輔嗣

○志疑者欲

從之則未明其令欲不從則懼罪及已志意懷疑所以
進退也志治者武非行令所宜而言利武人者志在使

人從治故曰利武人其猶蒙卦初六象云利用刑人以

正法也

正義

○巽在下不能果決進退申命行事之初

利於勇而行則正也非暴也志行其治者也

子夏傳

○

初六以陰居陽是不能卑巽者進无所應退在窮下心

无所定如此惟利剛武之人能用其正者

石介

○初六

有其權而无其位九二九三之所病故疑而進退也小

人而權在焉則易謂之武人武人貞其力而不正於君

志亂也反其志治則以貞於君爲利

東坡

○六以陰柔

居卑巽而不中處最下而承剛過於卑巽者也陰柔之人卑巽太過則志意恐懼而不安或進或退不知所從其所利在武人之貞若能用武人剛貞之志則爲宜也勉爲剛貞則元過卑恐懼之失矣

伊川

九二巽在牀下用史巫紛若吉无咎象曰紛若之吉得中也

二以陽處陰而居下有不安之意然當巽之時不厭其卑而二又居中不至已甚故其占爲能過於巽而丁寧煩悉其辭以自道達則可以吉而无咎亦竭誠意以祭

祀之吉占也

本義

○處巽之中既在下位而復以陽居

陰卑巽之甚故曰巽在牀下卑甚失正則入于咎過矣

能以居中而施至卑於神祇而不用之於威勢則乃至

于紛若之吉而亡其過矣故曰用史巫紛若吉无咎

王輔

嗣

○史謂祝史巫謂巫覡紛若者盛多之貌人有威勢

易爲行恭神道无形多生怠慢若能用居中之德行至

卑之道用之於神祇不行之於威勢則能致之於盛多

之吉而无咎過也

正義

○以陽居陰巽之太過入於牀

下失安身之所而非所處之正行未違理可以求福故

能用史巫紛若以享則鬼神降福吉而无咎

陸震

○處

異太過不能申命行事止可用之史巫史巫薦人之誠
馨折俯仰紛紜以異謝于神明故異甚而不爲咎蓋守
中存實譙卑可薦神獲吉

劉牧

○二居異時以陽處陰

而在下過於異者也牀人之所安異在牀下是過於異
過所安矣人之過於卑異非恐怯則譖說皆非正也二
實剛中雖異體而居柔爲過於異非有邪心也恭異之
過雖非正禮可以遠耻辱絕怨咎亦吉道也史巫者通
誠意於神明者也紛若多也苟至誠安於譙異能使通
其誠意者多則吉而无咎謂其誠足以動人也人不察
其誠意則以過異爲譖矣

伊川

九三頻巽吝象曰頻巽之吝志窮也

過剛不中居下之上非能巽者勉爲屢失吝之道也故其象占如此

本義

○頻頻感不樂而窮不得已之謂也

以其剛正而爲四所乘志窮而巽是以吝也

王輔嗣

○

乘陽无據爲陰所乘號令不行故志窮也

荀爽

○以陽

處陽在巽而不爲巽者也四爲巽主不得不承情有不

順故頻感而後巽志意窮故自恨而已

陸秉

○權治於

微物情之未然道而之善使樂以易從非逆而止之也

三用剛而必使由之頻數之令人所不與故曰吝也

達王

○三以陽處剛不得其中又在下體之上以剛亢之質

而居巽順之時非能巽者勉而爲之故屢失也居巽之時處下而上臨之以巽又四以柔巽相親所乘者剛而上復有重剛雖欲不巽得乎故頻失而頻巽是可吝也

伊川

○九三居兩巽之間一巽既盡一巽復來故曰頻巽夫謂之頻巽則頻失可知蓋九三以剛處剛卑巽之志不出於自然而勉爲之是可吝也

王景孟

六四悔亡田獲三品象曰田獲三品有功也

陰柔无應承乘皆剛宜有悔也而以陰居陰處上之下故得悔亡而又爲上田之吉占也三品者一爲乾豆一爲賓客一以充庖

本義

○乘剛悔也然得位承五卑得

所奉雖以柔御剛而依尊履正以斯行命必能獲強暴
遠不仁者也獲而有益莫善三品故曰悔亡田獲三品
一曰乾豆二曰賓客三曰克君之庖

王輔嗣

○六四悔

亡承九二而言也以上下二體言則二爲當位之大臣
以六爻言則四爲近君之大臣皆周公之象也悔亡流
言之悔亡也田獲三品指武庚及三監也凡象者象商
周以前事俾策者取類而占亦猶多識前言往行以畜
其德之意不必泥其陳跡可也

荀九家

○乘剛有悔然

居正得亡也寡者衆之所宗以一陰爲四陽所從如田

獵之有功所獲可以備三品也

石介

○田者興事之大

者也三品有功之盛者也柔而可以大有功者巽乎正

而得所附也

王介甫

○陰柔无援而承乘皆剛宜有悔

也而四以陰居陰得巽之正在上體之下居上而能下

也居上之下巽於上也以巽臨下巽於下也善處如此

故得悔亡所以得悔亡以如田之獲三品也田獲三品

及於上下也田獵之獲分三品一爲乾豆一供賓客與

充庖一頒徒御四能巽於上下之陽如田之獲三品謂

遍及上下也四之地本有悔以處之至善故悔亡而復

有功

伊川

○田武事也初利武人之貞四之田獲田武

而有功者也下三又有貴賤之等故曰三品

胡炳文

○

詩車攻註有上殺中殺下殺此三品之義也

龍昌期

九五貞吉悔亡无不利无初有終先庚三日後庚三日吉
象曰九五之吉位正中也

九五剛健中正而居巽體故有悔以有貞而吉也故得
亡其悔而不利有悔是无初也亡之是有終也庚更
也事之變也先庚三日丁也後庚三日癸也丁所以丁
寧於其變之前癸所以揆度於其變之後有所變更而
得此占者如是則吉也

本義

○以陽居陽損於謙巽然

秉乎中正以宣其令物莫之違故曰貞吉悔亡无不利
也化不以漸卒以剛直用加於物故初皆不悅也終於

中正邪道以消故有終也申命令謂之庚夫以正齊物不可卒也民迷固久直不可肆也故先申三日令著之後復申三日乃然後誅而无咎怨矣甲庚皆申命之謂也

王輔嗣

○甲庚者皆申命之謂甲者德政也豐以四

德創制彖言其正者先甲後甲所以原始要終也庚者刑政也巽以小亨申命故爻言其變曰先庚後庚所以信而審之也甲出也庚更也以庚變甲天之道也先後三日使知其意審其令也

陸希聲

○五居尊位爲巽之

主命令之所出也處得中正盡巽之善然巽者柔順之道所利在貞非五之不足在巽當戒也既貞則吉而悔

亡无不利貞正中也處巽出令皆以中正爲吉柔巽而
不貞則有悔安能无所不利也命令之出有所變更也
无初始未善也有終更之使善也若已善則何用命也
何用更也先庚三日後庚三日吉出命更改之道當如
是也甲者事之端也庚者變更之始也十干戊己爲中
過中則變故謂之庚事之改更當原始要終如先甲後
甲之義如是則吉也

伊川

上九巽在牀下喪其資斧貞凶象曰巽在牀下上窮也喪
其資斧正乎凶也

巽在牀下過於巽者也喪其資斧失所以斷也如是則

雖貞亦凶矣居巽之極失其陽剛之德故其象占如此

象云正乎凶言必凶

本義

○處巽之極極巽過甚故曰

巽在牀下也斧所以斷者也過巽失正喪所以斷故曰

喪其資斧貞凶

王輔嗣

○處上窮巽故過在牀下正理

須當威斷而喪之是正乎凶也

孔穎達

○周至夷王下

堂而迎覲者此巽在牀下之象禮樂征伐自諸侯出此

喪其資斧之象

許堅

○二巽過乎謙上巽過乎中俱失

所安

劉牧

○處上以此雖正亦凶况不貞乎

王介甫

○

牀人所安也在牀下過所安之義也九居巽之極過於

巽者也資所有也斧以斷也陽剛本有斷以過巽而失


其剛斷失其所有喪資斧也居上而過巽至於自失在正道爲凶也 伊川 ○上九位極人臣身極崇高愛其富貴權勢而患失之心生故必極其巽順阿諛以保其所
有不知順愈過身愈危小則喪資用大則喪權勢雖正亦危況不正乎 楊萬里

測曰巽之爻辭初三上皆以巽之不得中正者言初上太過三則不及也進退者初六之象也利武人之貞蓋爲占者設以矯其弊也周元公所謂懦弱无斷聖人立教俾自易其惡自至其中而止焉者其斯之謂歟九二雖陽剛之才而處陰柔之位又居下體而

上應九五剛健之君二能巽而得中不至已甚故爲
巽在牀下用史巫紛若之象史巫者臣謁誠以告其
君之比也紛若者重巽之義也吉且无咎可知已此
即周公巽而居東又作爲七月鴟鴞諸詩以自道達
於成王之事傳所謂剛巽乎中正而志行周公蓋其
人也九三過剛不中既非下人之資居下之上又挾
上人之勢本非能巽者也其巽也特勉爲之耳非出
於誠心也不誠則不可久故頻失而頻巽吝非巽之
吝頻失之吝也六四悔亡承九二而言也以上下二
體言則二爲當位之大臣以六爻言則四爲近君之

大臣皆周公之象也且六四得巽之正又居上之下
巽於上也以巽臨下巽於下也此勞謙之義故得悔
亡而田獲三品也田獲三品蓋指武庚及三監也若
然則上可以格七廟中可以燕賓僚下可以肥百姓
也故以田獲三品爲象傳曰有功也不其然乎九五
剛健中正其德本无不善但以居巽體之故則苟且
偷安之弊有不免焉是以有悔然以其剛巽乎中正
也一圖謀而變更焉則其志行矣故曰貞吉悔亡而
无不利以是觀之是无初而有終也然其變更也必
先庚三日丁寧於變之前後庚三日揆度於變之後

然後申命以行事焉乃所謂貞也此所謂吉也鄒臨
川曰先庚三日後庚三日則入於理者深而見於行
者決成王懲毖後患營洛邑而作誥以祈天永命正
圖終之事也上九過巽而喪其資斧以取凶者出其
柔懦而无立也若齊景公之於田氏魯哀定之於三
家是已



兌下
兌上 兌

序卦巽者入也入而後說之故受之以兌兌者說也物
相入則相說相說則相入兌所以次巽也

程傳

兌亨利貞

兌說也一陰進乎二陽之上喜之見乎外也其象爲澤取其說萬物又取坎水而塞其下流之象卦體剛中而柔外剛中故說而亨柔外故利於貞蓋說有亨道而其妄說不可以不戒故其占如此又柔外故爲說亨剛中故利於貞亦一義也

本義

○兌說也說卦曰說萬物者

莫說平澤以兌是象澤之卦故以兌爲名澤以潤生萬物所以萬物皆說施於人事猶人君以恩惠養民民无不說也惠施民說所以爲亨以說悅物恐陷譎邪其利在於貞正故曰兌亨利貞

孔穎達

○不謂之說而謂之

兌者聖賢感天下之心必以仁義恩惠之道不可以言

語口舌故去其言而爲兌

胡曰

○兌說也說致亨之道

也能說於物物莫不說而與之足以致亨然爲說之道利於貞正非道求說則爲邪諂而有悔咎故戒利貞也

伊川

○二五剛中而五又正乃戒以利貞何也在二三

四不正則陷於邪諂悔吝將生故戒之云爾

朱震

○嘗

攷三女之卦聖人多以貞戒之離曰利貞亨巽曰利貞

兌曰亨利貞皆以正言也三男之卦則不言貞震曰亨

坎曰心亨艮曰艮其背而已蓋陰柔之質多病於不正

而陽剛之體爲能有立故也

丘行可

○卦辭與咸同咸

以艮陽下兌陰則相感感則亨矣而相感易失於不正

兌以二陽下一陰則相說說則亨矣而相說亦易流於不正利貞者戒辭也三男之卦不言利貞剛固貞也故咸取无心之感兌取不言之說

胡炳文

測曰兌之義說也一陰見於二陽之上喜之見乎外也大傳以卦體言之而曰剛中而柔外說以利貞蓋剛中者剛德蘊中之象无所偏倚而其心體常悅即子思子之所謂中是已柔外者和以應物之象无所乖戾而人已之間皆悅即子思子之所謂和是已悅有亨之道焉故其占曰兌亨然心體常悅或失則離非正也故曰可離非道也是故君子戒慎乎其所不

賄恐懼乎其所不聞夫是之謂致中應物常悅或失則流非正也故曰知和而和不以禮節之亦不可行又曰和而不流強哉矯夫是之謂致和故其占又曰利貞夫悅而能貞此悅道之至善也傳所謂順乎天而應乎人子思子所謂天地位萬物育罔不由之蔡虛齋曰悅以先民悅以犯難皆悅以正者也民忘其勞民忘其死者貞之利也利則亨矣悅而不正則民不勸安在其爲利乎

彖曰兌說也

釋卦名義

本義

○兌之義說也一陰居二陽之上陰說

於陽而爲陽所說也

伊川

剛中而柔外。說以利貞。是以順乎天而應乎人。說以先民。民忘其勞。說以犯難。民忘其死。說之大。民勸矣哉。

以卦體釋卦辭而極言之

本義

○說而違剛則諂剛而

違說則暴剛中而柔外所以說以利貞也剛中故利貞柔外故說亨天剛而不失說者也故曰順乎天

王輔嗣

○先以說豫撫民然後使之從事則民皆竭力忘其從事之勞先以說豫勞民然後使之犯難則民皆授命忘其犯難之死施說於民所致如此豈非說義之大能使民勸勉矣哉

孔穎達

○天之所助者順也人之所助者

信也。柔外爲順，剛中爲信。故得順乎天而應乎人。劉牧
○陽剛居中，中心誠實之象。柔爻在外，接物和柔之象。
故爲說而能貞也。利貞，說之道宜正也。卦有剛中之德，
能貞者也。說而能貞，是以上順天理，下應人心，說道之
至正至善者也。若夫違道以干百姓之譽者，苟說之道
違道不順天，干譽非應人，苟取一時之說耳，非君子之
正道。君子之道，其說於民如天地之施，感於其心而說
服无斁，故以之先民，則民心說隨而忘其勞，率之以犯
難，則民心悅服於義而不恤其死。說道之大，民莫不知。
勸勸謂信之而勉力順從人君之道，以民心悅服爲本。

故聖人贊其大

伊川

○天人俱說是惟无事无難也有

事而與民趨之則勞而忘勞有難而與民犯之則死而忘死蓋說而不自知其勞且死也知聖人勞我以逸我死我以生我也是以悅而自勸也夫勸民與民自勸相去遠矣是以聖人大之曰說之大民勸矣哉

楊萬里

象曰麗澤兌君子以朋友講習

兩澤相麗互相滋益朋友講習其象如此

本義

○麗猶

連也施說之盛莫盛於此

王輔嗣

○兩澤相連潤說之

盛同門曰朋同志曰友朋友聚居講習道義相說之盛

莫過於此也

孔穎達

○兩說而合莫過講習

子夏傳

○

說於聲色極必有害說於道義久而彌益

劉牧

○朋友

講習取其樂而不流也

東坡

○天下之悅不可極惟朋

友講習雖過悅无害兌澤有相滋益處朋友講習更莫

如相觀而善工夫多

明道

○麗澤二澤相附麗也兩澤

相麗交相浸潤互有滋益之象故君子觀其象而以朋

友講習朋友講習互相益也先儒謂天下之可說莫若

朋友講習朋友講習固可說之大者然當明相益之象

伊
川

測曰大衆以朋友講習者何曰其兩相悅乎是故不

悅則不合合而不悅何益之有夫講言乎其知也習

言乎其行也講而習之不亦悅乎故兩悅足以進德也猶兩澤足以相潤也而天下之益莫大於是矣

初九和兌吉象曰和兌之吉行未疑也

以陽爻居悅體而處最下又无繫應故其象占如此云

未疑者居卦之初其說也正未有所疑也本義○居兌

之初應不在一无所黨繫和兌之謂也說不在諂履斯

而行未見有疑之者吉其宜矣王輔嗣○以剛正之說

首出門而和人也何往不吉行豈疑哉子夏傳○九二

剛中而說君子也初九說君子而與之和是以吉王介甫

○剛而處說无偏繫之私能可否相濟者也九四疾惡

六三小人然體巽不果不果疑也初九動而上行以濟

其決初九遠於六三嫌於說小人九四未疑也是以能

濟其決否則疑矣晉祐實直而博范宣子朝夕顧之以

問國事不正其身未有能決人之疑者故曰和兌之吉

未疑也

朱震

○初雖陽爻居說體而在最下无所繫應

是能卑下和順以爲說而无所偏私者也以和爲說而

无所偏私說之正也陽剛則不卑居下則能巽處說則

能和无應則不偏處說如是所以吉也

伊川

○爻位皆

剛不比於柔得說之正和而不流於邪者也故吉

蔡淵

九二孚兌吉悔亡象曰孚兌之吉信志也

剛中爲孚居陰爲悔占者以孚而說則吉而悔亡矣

本義

○說不失中有孚者也失位而說孚吉乃悔亡也

王輔嗣

○象云信志者失位而得吉是其志信也

正義

○失位

與三豈无悔也志在和人故其說信中不失正故吉也

夫何悔焉

子夏傳

○二不違中有信者也說不爽信吉

其宜矣然比於三而狎小人有悔也以其能退而自守

不失其正故得悔亡且和而不同謂之和信於其類謂

之孚六三小人也初以遠之而无嫌至九二則初疑之

外與而內不與所以信於初九也

劉牧

○信道篤而自

知明說之不以道不說也

周簡子

○私繫於近悔也誠

於接物信而不妄吉且悔亡

橫渠

○二承比陰柔陰柔

小人也說之則當有悔二剛中之德孚信內充雖比小人自守不失君子和而不同說而不失剛中故吉而悔亡非二之剛中則有悔矣以自守而亡也

伊川

○二應

五君臣同德而相說孚兌之吉也

李季卿

○二孚孚五

也以陽居陰本有悔孚五則吉而悔亡然以九二則悔以九五則有厲何也六三爲兌之主說猶未極上六成兌之主而居兌之極二比于三能不孚乎三而孚五故吉五兌之君也而比上不孚乎二而孚上有厲矣

胡炳文

六三來兌凶象曰來兌之凶位不當也

陰柔不中正爲兌之主上无所應而反來就二陽以求

說凶之道也

本義

○以陰柔之質履非其位來求說者

也非正而求說邪佞者也

王輔嗣

○六三其便辟善柔

便佞以求說於人者乎語所謂損者三友蓋其象也

荀爽

○三爲一卦之主而以不正用說欲以邪諂招來剛直

誘掖衆陽使之悅已者也治容誨淫邪行來兌凶其宜

也

陸希聲

○三陰柔不正下親於二二避之而不納故

稱來兌凶也兌體趨下是來親於下也二以其處不正

是以避之

劉牧

○一陰爲四陽之主來者以皆說之如

一小人居四君子間也諂佞之人不當其位所以凶

石介

○六三陰柔不中正之人說不以道者也來就之以求說也比於在下之陽枉已非道就以求說所以凶也之內爲來上下俱陽而獨之內者以同體而陰性下也失道下行也伊川○六三柔而不中故來就在下之陽而有妄說之凶无他以柔居剛位不當故也來者反而之內也丘行可

九四商兌未寧介疾有喜象曰九四之喜有慶也

四上承九五之中正而下比六三之柔邪故不能決而商度所說未能有定然質本陽剛故能介然守正而疾惡柔邪也如此則有喜矣象占如此爲戒深矣本義○

商商量裁制之謂也介隔也三爲佞說將近至尊故四
以剛德裁而隔之匡內制外是以未寧也處於幾近閑
邪介疾宜有喜也

王輔嗣

○四能防邪隔疾至尊所善

天下蒙賴故言有慶

孔穎達

○四以陽居陰是說而能

和者又體剛而不爲邪諂也比于三而不與之同體是
能專介而疾乎小人也下同初而說于賢宜有喜而有

慶陽爲賢陰爲小人也

劉牧

○商取西方金剛斷之義

介者言剛介之德嫉惡佞人也

石介

○三柔而已乘之

上柔而君近之居兌之時不幸爲邪柔小人之所介欲
施說而不能故商度而未安然五剛而正中終莫得而

諺之小人不得其志則病矣小人病則君子喜是以四

間於二柔之間可喜也

王逢

○三有來兌之凶五有孚

剝之厲四處其位豈得安乎若能耿介疾惡善必來應

也

鮮于侁

○四上承中正之五而下比柔邪之三雖剛

陽而處非正三陰柔陽所說也故不能決而商度未寧

謂擬議所從而未決未能有定也兩間謂之介分限也

地之界則加田義乃同也故人有節守謂之介若介然

守正而疾遠邪惡則有喜也從五正也說三邪也四近

君之位若剛介守正疾遠邪惡將得君以行道福慶及

物爲有喜也若四者得失未有定繫所從耳

伊川

○六

三者君心之膏肓也九四者膏肓之鍼艾也故九四者六三之所甚不喜也六三不喜則九四有喜矣非九四之私喜也天下國家之大慶也

楊萬里

九五孚于剝有厲象曰孚于剝位正當也

剝謂陰能剝陽者也九五陽剛中正然當說之時而居尊位密近上六上六陰柔爲說之主處說之極能妄說以剝陽者也故其占但戒以信于上六則有危也象言位正當與履九五同義

本義

○比于上六而與相得處

尊正之位不說信乎陽而說信乎陰孚于剝之義也剝之爲義小人道長之謂象以其居正當之位信于小人

而疏君子故曰位正當也

王輔嗣

○九五處尊正之位

下无其應比於上六與之相得是說信於小人故曰孚

于剝信而成剝危之道也故曰有厲象云位正當者責

之也

孔穎達

○五本應於九二九二有剛正之德已不

能盡柔巽以任用之反比於上六邪佞刻剝不正之臣

是其危厲之甚也

胡旦

○六三進而上則四五消有剝

牀象上六有剝廬象九五居尊位在二柔之間故曰孚

于剝有厲

朱震

○九五得尊位而處中正盡說道之善

矣而聖人復設有厲之戒蓋堯舜之盛未嘗无戒也如

四凶處堯朝隱惡而順命是也聖人非不知其終惡也

取其畏罪而強仁耳五若誠心信小人之假善為實善而不知其包藏則危道也剝者消陽之名陰消陽者也蓋指上六故孚于剝則危也以五在說之時而密比於上六故為之戒雖舜之聖且畏巧言令色安得不戒也說之惑人易入而可懼也如此

伊川

○上柔處說之極

无他繫應惟附五以求悅也五位雖當上柔親附說而信之必至剝剛故曰孚于剝

徐幾

上六引兌象曰上六引兌未光也

上六成說之主以陰居說之極引下二陽相與為說而不能必其從也故九五當戒而此爻不言其吉凶

本義

○以夫陰質最處說後靜退者也故必見引然後乃說也

王輔嗣

○上六不同六三自進求說雖免躁求之凶

亦有後時之失所以經无吉文以其道未光故也

孔穎達

○上六不累於物是志於高尚然執德不固見誘必從故稱引兌雖能說君之旨乘剛而不爲之下然喪其高尚之風未足爲光也

劉牧

○上六以陰柔居一卦之極

當无位之地欲以柔邪不正之道苟且以牽引天下之

民使歸悅於己雖得人之悅其道未足爲光大也

胡翼之

○六三上六皆兌之小人六三履非其位處於二陽之間以求說爲兌者故曰來兌言初與二不招而自來其

心易知其爲害淺故二陽吉而六三凶上六超然於外
不累於物此小人之託於无求以爲兌者九五引之而
後至其心難知其爲害深剝者五陰剝一陽上六之害
何至是也九五以正當之位而孚於難知之小人其至
於剝豈足怪哉雖然其心蓋不知而賢之非知其小人
之實也知其實則去之矣故有厲而不凶然上六所以
不凶何也曰難進君子之事使上六引而不兌則其道
光矣東坡○上說道之成六已輔九五剛健中正之君
宜有膏澤下於民而未光何也以引六三之小人也初
九剛正不疑於三而行九二剛中不比於三而悔亡九

四以三爲疾九五孚于三而厲上六引三而朱光小人

以說進而爲害可不慮乎

朱震

○他卦至極則變兌爲

說極則愈說上六成說之主居說之極說不知已者也
故說既極矣又引而長之然不至悔咎何也曰方言其
悅不知已未見其所說善惡也又下乘九五之中正无
所施其邪說六三則承乘皆非正是以有凶

伊川

○九

陰爻稱引萃六二引吉引下而升也故吉兌上六引二

陽而說引之者將以剝之也五言有厲上不言凶可知

矣


胡炳文

測曰初九和兌以心之本體言无所繫應其和順於

道德以爲悅者乎夫心既和順於道德其行也又何
所疑乎故傳曰行未疑也張子謂以陽居下无所比
附出門同行自信者也無象傳而言亦通九二孚
兌以與人言二剛中爲孚居陰比三爲悔若能上孚
九五則同德相悅上下交而德業成故吉而悔亡推
之順親信友其義皆同蓋未有誠而不動者也六三
其便辟善柔便佞以求悅於人者乎語所謂損者三
友蓋其象也九四上承九五而下比六三在邪正之
間故有商兌之象得正則吉不得則凶故未能有定
介疾有喜與衆之利貞同義蓋商兌未寧者勢之二

也介疾有喜者志之一也始雖疑於勢之二終則決
於志之一故傳曰有慶也在大臣則有以保其名位
在君子則有以成其德業非有慶而何九五有剛中
之德未必孚於剝也而聖人設有厲之戒者程正公
以爲雖堯舜之極盛未嘗无戒也悅之惑人易入而
可懼也如此公他日爲講官嘗言於朝曰人主一日
之間接賢士大夫之時多親宦官宮妾之時少則可
以涵養氣質而薰陶德性此可與九五之傳相發明
也上六居說之極而不知變故有引兌之象丘行可
曰三以柔居剛爲下兌之主動而求陽之悅故曰來

兌上以柔居柔爲上兌之主靜而誘陽之悅故曰引
兌來兌之惡易見而引兌之情難知故此爻當以有
厲爲戒云



坎下
巽上 渙

序卦兌者說也說而後散之故受之以渙說則舒散也
人之氣憂則結聚說則舒散故說有散義渙所以繼兌
也爲卦巽上坎下風行於水上水遇風則渙散所以爲
渙也 程傳

渙亨王假有廟利涉大川利貞

渙散也爲卦下坎上巽風行水上離披解散之象故爲

渙其變則本自漸卦九來居二而得中六往居三得九之位而上同於四故其占可亨又以祖考之精神既散故王者當至於廟以聚之又以巽木坎水舟楫之象故利涉大川其曰利貞則占者之深戒也

本義

○渙卦名

也序卦曰說而後散之故受之以渙然則渙者散釋之名雜卦曰渙離也此又渙是離散之號也蓋渙之爲義小人遭難奔迸而逃避也大德之人能於此時建功立德散難釋險故謂之爲渙能釋險難所以爲亨故曰渙亨王假有廟者王能渙難而亨可以至於建立宗廟故曰王假有廟也利涉大川者德洽神人可濟大難故曰

利涉大川利貞者大難既散宜以正道而柔集之故曰

利貞

孔穎達

○人氣聚則生氣散則死故聖人以神氣

渙散乃立宗廟以萃聚之是以萃渙二卦皆曰王假有廟所以明聚散之理爲教化之宗主也物散則失正故

利貞也

陸希聲

○京氏傳云渙自否來惟否則渙以卦

氣言之否七月辟卦渙六月卿卦否則於剝又一變爲坤則羣龍皆无首矣其當殷之末世邪由復臨泰壯以至於夬其周之盛德邪故天下之羣皆渙而歸於周渙六月卿卦蓋殷紂侯伯之象渙歸於周則周王當假于有廟矣此文王三分天下有其二之時也故曰利涉大

川言利於濟天下之難也爻象九五曰渙汗其大號則

已爲武王之時矣郎顗○二以身入險中四則輔君任

事上下同志厥事乃濟李晟入險陸贄輔君二爻之象

薛贊

○渙離散也人之離散由乎中心離則散矣治

乎散亦本於中能收合人心則散可聚也故卦之義皆

主於中利貞合渙散之道在乎正固也伊川○天下離

散不安其居聖人將以聚之故以宗廟爲先宗廟者收

其心之渙散而存之也人孰不有父母知報本則知祭

祀出於人心復其本心則離散者可合而天下无事矣

治渙之道也朱震○萃因民之聚立廟以堅其歸向之

心所以爲懷保之道皆以統攝民心而堅疑之也

李季辨

測曰序卦說而後散之故受之以渙此孟軻氏死於安樂之說也渙所以繼兌也文王蒙辭正言殷周間事渙之卦變本自否來九來居二得中而不窮于險與爻象渙奔其杭同義六往居四得正位於外而上同乎五之中與渙其羣渙有丘同義文王出羑里而爲西伯得專征伐剛來而不窮也及聽虞芮之訟受天命爲六州主乃率之以服事殷紂而天下咸歸往焉柔得位乎外而上同也此之謂渙而亨也王假有廟所以收合人心以聚其渙傳曰王乃在中也與渙

王居同義蓋已正位爲大君矣厥後嗣君追王大王
王季上祀先公以天子之禮此善繼文王之志者也
利涉大川利於涉險以濟天下之渙傳曰乘木有功
也蓋取巽木坎水有舟楫之象厥後武王燮伐大商
綏厥士女用附我大邑周此善述文王之事者也蓋
至是則亨之極矣顧非正而且固何以得之然有周
之所以拯渙者皆應乎天而順乎人極天下之至正
者也而天下之歸服於有周咸固結而不可解詩所
謂无思不服是已故彖以利貞終焉或問王乃在中
乘木有功何也曰程傳云卦才之義皆主於中也蓋

剛來既中柔上同于五亦中也高陵呂氏曰中者天下之大本故能乘木而行仁也

彖曰渙亨剛來而不窮柔得位乎外而上同

以卦變釋卦辭

本義

○二以剛來居內而不窮於險四

以柔得位乎外而與五同內剛而无險困之難外順而无違道之乖是以亨利涉大川利貞也凡剛得暢而无忌回之累柔履正而同志乎剛則皆亨利涉大川利貞也

王輔嗣

○渙卦本自否來九來居二得中而不窮于險

與爻象渙奔其杙同義六往居四得正位於外而上同

乎五之中與渙其羣渙有丘同義

蜀才

○二以剛在險

中力能濟難四以柔在險外動无違逆故亨代淵○渙

之能亨者以卦才如是也渙之成渙由九來居二六上居四也陽剛之來則不窮極於下而處得其中柔之往則得正位於外而上同於五之中巽順於五乃上同也四五君臣之位當渙而比其義相通同五乃從中也當渙之時而守其中則不至於離散故能亨也伊川○以

二四往來明卦義不窮上同明亨剛來不窮即需剛健不陷義不困窮之象又曰觀孔子之彖全在二四兩爻九六往來成夾輔九五之功所以亨渙而王者以之假廟以之涉川以之貞固皆兩爻之力也馮奇之

王假有廟王乃在中也

中謂廟中

本義

○王乃在乎渙然之中故至有廟也

王輔

嗣

○此重明渙時可以有廟之義險難未夷方經畧

今在渙然之中可以至於立宗廟也

孔穎達

○此本否

卦乾之九四來居坤中剛來成坎水流而不窮也坤之六二上升乾四柔位乎外上承貴主與上同也鄭康成云自五以下爲互艮門闕象上卦巽爲木此廟象也五王象在廟中

盧氏

○遇渙之時兩陰不能陷一陽二免

於險四不應內而上同乎五此渙之所以亨九五以王德居王位能拯天下之難得四海之歡心以事其親能

假有廟矣

王介甫

○若大難未散王亦同在難中豈驥

有廟患難已散同在渙然之中乃可以安神保功故曰

王乃在中也

代淵

○大凡爲民除險難須在上卑巽以

順民散其患難然後道德亨通乘木涉川亦是濟難之

象王假有廟者渙是釋散患難之初民未知禮須假有

廟以爲教化之宗

石介

○當渙之濟何以御之在王者

宅中而正位託天地宗廟之靈以固結民之離心故曰

王假有廟王乃在中也

楊繪

○世之方治如大川安流

而就下及其亂也潰溢四出而不可止方渙散之時宜

經營四方之不暇而其彖曰王假有廟其象曰先王以

享于帝立廟何也曰犯難而爭民之所疾也處危而不
媮者衆之所恃也先王居渙之中安然不爭而身爲長
久之計宗廟既立則享帝之位定而天下之心始有宗
矣

東坡

○王假有廟之義在萃卦詳矣天下離散之時

王者收合人心至於有廟乃是在其中也在中謂求得
其中攝其心之謂也中者心之象剛來而不窮柔得位
而上同卦才皆主於中也王者拯渙之道在得其中而

已

伊川

利涉大川乘木有功也

乘木即涉難也木者專所以涉川也涉難而常用渙道

必有功也

王輔嗣

○乘木涉川必不沉溺以渙濟難必

有成功故曰乘木有功也

孔穎達

○二不窮下四同乎

上以坎爲水巽木乘之所以利涉有功也

薄洙

○治渙

之道當濟於險難而卦有乘木濟川之象上巽木也下

坎水大川也利涉險以濟渙也

伊川

○濟難者才也散

難者非才也德也巽之才木也其德風也水之殘則溺

萬物然乘一木則悠然而濟水之怒則決九山然遇一

風則欣然而散才以濟之德以散之天下之大難一朝

渙然而不復聚渙之所以亨也

楊萬里

象曰風行水上渙先王以享于帝立廟

皆所以合其散

本義

○風行水上激動波濤散釋之象

故曰風行水上渙先王以渙然无難之時享于上帝以

告太平建立宗廟以祭祖考故曰先王以享于帝立廟

也

孔穎達

○陰上至四承五爲享帝陽下至二在中爲

立廟

虞仲翔

○冬月天地閉塞水凝爲冰春風一動釋

其否結解其冰凍亦得此渙象王者出民塗炭之後法

此以教民爲本享帝所以訓民事君立廟所以教民事

親二者忠孝之道教化所先也

石介

○風行水上有渙

散之象先王觀是象救天下之渙散至于享帝立廟也

收合人心无如宗廟祭祀之報出于其心故享帝立廟

人心之所歸也繫人心合離散之道无大於此

伊川○

享帝于郊象巽之高立廟於宮象坎之隱

項世安

測曰享帝立廟何以體風行水上也曰改渙也幽明

一理能享于帝則能得民而可以合其散矣

初六用拯馬壯吉象曰初六之吉順也

居卦之初渙之始也始渙而拯之爲力既易又有壯馬

其吉可知初六非有濟渙之才但能順乎九二故其象

占如此

本義

○渙散也處散之初乖散未甚故可以遊

行得其志而違於難也不在危劇而後乃逃竄故曰用

拯馬壯吉

王輔嗣

○觀難而行不與險爭故曰順也

孔穎

達○渙之初可以散動二能濟而已附之故顯而行之

无畏忌也壯馬馳騁而得其吉

子夏傳

○初以險處下

在渙散之始於是往拯之不可後時固當用剛壯之馬

急於解民之難執柔順之道以拯濟之使得萃而不散

吉之道也

胡翼之

○九二在下而有能行之材馬象也

初乘之以拯夫險用馬之象也二得其拯而初得其隨

是以壯吉

王介甫

○初六身既无位衆不羈縻足可避

於患難宜乎乘馬自往而得壯吉坎爲馬內難而行不

與險爭故曰順也如齊小白入莒之類是已

劉緯

○九

二在險中得初九而安故曰用拯馬壯吉明夷之六二

有馬不以自乘而以拯上六之傷渙之初有馬不以自乘而以拯九二之險故象皆曰順言中順之正也

東坡

○六居卦之初渙之始也始渙而拯之又得馬壯所以吉也六爻獨初不云渙者離散之勢辯之宜早方始而拯之則不至於渙也爲教深矣馬人之所託也託於壯馬故能拯渙馬謂二也二有剛中之才初陰柔順兩皆无應无應則親比相求初之柔順而託於剛中之才以拯其渙如得壯馬以致遠必有濟矣故吉也拯渙於始爲力則易時之順也

伊川

九二渙奔其机悔亡象曰渙奔其机得願也

九而居二宜有悔也然當渙之時來而不窮能亡其悔者也故其象占如此蓋九奔而二杌也

本義

○杌承物

者也謂初也二與五應與初相得而初得遼難之道離

散而奔得其所安故悔亡也

王輔嗣

○奔初獲安是得

其願

孔穎達

○九二六三爻辭蓋與彖合彖曰剛來是

渙奔也曰不窮是得其杌也二本自四來亦猶文王自

姜里來爲西伯遠商受而當幽險之時故曰悔亡六三

如太顛闔天之於周文王是其象也故曰渙其躬无悔

荀九家

○二在險中渙而未出居失其位不可以安故

宜出奔三在坎上已先見渙而位亦不當固非所安下

與二比同志相得故二奔之必得所願能憑於三所以

悔亡

陸象

○居險難之中以陽居陰本有悔也六三將

出於險若能依憑六三同出於險可以悔亡

石介

○諸

爻皆云渙謂渙之時也在渙離之時而處險中其有悔

可知若能奔就所安則得悔亡也杞者俯憑以爲安者

也俯就下也奔急往也二與初雖非正應而當渙離之

時兩皆无與以陰陽親比相求則相賴者也故二目初

爲杞初謂二爲馬二急就於初以爲安則能亡其悔矣初

雖坎體而不在險中也蓋渙之時合力爲勝先儒皆以

五爲杞非也方渙離之時二陽豈能同也若能同則成

濟渙之功當大吉豈止悔亡而已伊川○奔九象互震

爲足爲動。艮二象互震爲木。位偶爲足。朱子曰九奔二

机蓋以卦變言也。九剛故象奔。二中故象机。九來居二

得中而安故悔亡。胡炳文

六三渙其躬无悔。象曰渙其躬志在外也。

陰柔而不中正。有私於己之象也。然居得陽位。志在濟

時能散其私。以得无悔。故其占如此。大率此上四爻皆

因渙以濟渙者也。本義○渙之爲義。內險而外安者也。

散躬志外不固。所守與剛合志。故得无悔。王輔嗣○六

三內不比二。而外應上九。所以能渙其躬。正爲身在於

內而應則在上故曰志在外也

孔穎達

○上九居一卦

之極有剛明之才以三爲正應六三不固其守往從於上然不能濟天下之大事亦可以釋一身之患而无悔也

胡旦

○如晉重耳內有險難而志在外

劉緯

○應上

近二二者必爭故渙其躬无所適從惟有道者是與而

安

東坡

○三在渙時獨有應與无渙散之悔也然以陰

柔之質不中正之才上居无位之地豈能拯時之渙而

及人也止於其身可以无悔而已上加渙字在渙之時

躬无渙之悔也

伊川

六四渙其羣元吉渙有丘匪夷所思象曰渙其羣元吉光

大也

居陰得正上承九五當濟渙之任者也下无應與爲能散其朋黨之象占者如是則大善而吉又言能散其小羣以成大羣使所散者聚而若丘則非常人思慮之所及也

本義

○踰乎險難得信體巽與五合志內掌機密

外宣化命者也故能散羣之險以光其道然處於卑順不可自專而爲散之任猶有丘墟匪夷之慮雖得元吉所思不可忘也

王輔嗣

○六四爻辭亦與彖合四本在

否之二今渙其下體之初與三而進居乎四且履得其以上同於五之中正故彖曰柔得位于外而上同文

王伐崇作豐而六州諸侯莫不來同詩云王功伊濯維
豐之垣四方攸同王后維翰乃渙有丘之象也由出姜
里言之故曰渙奔其杭由作豐言之故曰渙有丘易之
變動不居如此荀九家○丘者不平之象得位散險不

能使初附已以求免難故心未平也然志在奉上思渙
其羣雖不應初固未傷也陸震○四首散險難上輔至

尊宜其光大普濟其衆不可小存險難有所遐遺以起
怨望不平之思四質柔任重懼其志弱不盡遐濟故申
戒之劉牧○居大臣之位初出民於塗炭猶有丘墟不
平之事不可夷平其思慮如漢皇初出民於暴秦之間

事猶草創至文景之世有大臣之佐然後紀綱制度方

稍復古而光大也

石介

○丘龍施不平之地六四上奉

九五之君下爲百官之長權大職重常終日乾乾不敢

少安亦未嘗平其思慮也

胡旦

○六四曰渙其羣元吉

夫羣者聖人之所欲渙以混一天下者也當人心渙散

之時各相朋黨以成私羣惟六四能渙小人之私羣成

天下之統一此所以元吉也

老泉

○山地之高以止而

物附焉者也尊位之象也丘山之次也近尊而德上同

之象渙有丘大公至正心无偏繫則非等夷所思不與

六三而初六不應也故曰渙其羣匪夷所思也

王介甫

○丘猶聚也得位上同散者聚也故曰渙有丘慮勞王
室不安其慮故曰匪夷所思

薛溫其

○渙四五二爻義

相須故通言之彖故曰上同也四巽順而正居大臣之
位五剛中而正居君位君臣合力剛柔相濟以拯天下
之渙者也方渙散之時用剛則不能使之懷附用柔則
不足爲之依歸四以巽順之正道輔剛中正之君君臣
同功所以能濟渙也天下渙散而能使之羣聚可謂大
善之吉也渙有丘匪夷所思贊美之辭也丘聚之大也
方渙散而能致其大聚其功甚大其事甚難其用至妙
夷平常也非平常之見所能思及也非大賢智孰能如

是伊川

九五渙汗其大號渙王居无咎象曰王居无咎正位也

陽剛中正以居尊位當渙之時能散其號令與其居積則可以濟渙而无咎矣故其象占如此九五巽體有號令之象汗謂如汗之出而不反也渙王居如陸贄所謂散小儲而成大儲之意本義○處尊履正居巽之中散

汗大號以盪險阨者也爲渙之主惟王居之乃得无咎

也王輔嗣○渙王居无咎者爲渙之主名位不可假人

惟王居之乃得无咎以九五是王之正位若非王居之

則有咎矣正義○九五正象武王大告武成王位爲天

王之事

荀九家

○五建二爲諸侯使宜布彌令若汗之

出身不復反也九五爲散險難之主宜有非常之赦令

以解國人之罪戾若病者得汗則百骸俱暢也王者居

渙然之中志在散險用時之中道方可无咎非此時而

用之惠姦之道也故曰渙王居无咎

陸希聲

○散大彌

令爲民除其疾苦如汗之通腠理壅滯亦取必行而不

可反也渙王居无咎者爲民除患害險難非皇極之君

不能居正位也

石介

○汗取其周徧而不反渙然之中

不知孰爲臣孰爲主至於有廟使天下知王者之所在

故曰渙王居言渙之中居矣

東坡

○五與四君臣合德

卷之三

以剛中正巽順之道治渙得其道矣唯在浹洽於人心
則順從也當使彌令洽於民心如人身之汗浹於四體
則信服而從矣如是則可以濟天下之渙居王位為稱
而无咎大彌大政令也謂新民之大命救渙之大政再
云渙者上謂渙之時下謂處渙如是則无咎也在四已
言元吉五唯言稱其位也渙之四五通言者渙以離散
為害拯之使合也非君臣同功合力其能濟乎爻義相
須時之宜也 伊川 ○王居渙號則正位以令天下得君
道也故无咎 郭雍 ○汗坎象號巽命象居陽實象 胡炳文
上九渙其血去逖出无咎象曰渙其血遠害也 程傳云象血下脫去

字

上九以陽居渙極能出乎渙故其象占如此血謂傷害
逃當作惕與小畜六四同言渙其血則去渙其惕則出
也

本義

○逃遠也最遠於害不近侵克散其憂傷遠出

者也散患於遠害之地誰將咎之哉

王輔嗣

○應獨者

多志於爭此易之常情也上獨有應而遠於傷害者當
其渙極得行其志從其道故血去害遠而无咎

子夏傳

○渙散其血是弗相傷也三爲正應而二憑之與二爭
三理當相害處在卦外志不必傷故曰渙其血也當渙
離之時无救物之志全身遠害去而遠出雖獲无咎固

未光也既以去三而更遠出遠害之甚者也干寶○六

三以柔乘剛在內困於有難之地陰之傷也故曰血上

九應之則與之俱傷矣去而逃則遠害矣王介甫○

渙之諸爻皆无繫應亦渙離之象唯上應於三三居險

陷之極上若下從於彼則不能出於渙也險有傷害畏

懼之象故云血惕然九以陽剛處渙之外有出渙之象

又居巽之極爲能巽順於事理故云若能使其血去其

惕出則无咎也其者所有也渙之時以能合爲功獨九

居渙之極有繫而臨險故以能出渙遠害爲善也伊川

測曰渙六爻之義大率與彖辭相爲表裏初六渙之

始也拯之則易爲力且初以柔居九二之下與之相比以理勢言必能順乎九二故賴九二之力以拯之是得其馬之壯也如是則有以濟其渙而吉也此象殷高宗傳說之事又成王嗣位之初而遭武庚之變得周公以拯之亦似之云九二爻辭以卦變起義與彖傳合傳曰剛來是渙奔也曰不窮是得其机也本義所謂九奔而二机是也故其占曰悔亡文王出羑里來爲西伯正此爻義六三陰柔而不中正爲私其躬之象宜有悔矣然九二渙於四而來奔三與之同體而比於四且居下體之上當濟渙之任者也故能

公爾忘私見危授命渙其躬以求濟天下之渙則得
无咎傳曰志在外也渙躬之志其在天下乎如四友
之臣之於文王是其象也六四爻義亦以卦變言四
本在二與坤同體今渙其下體之初與三而進居於
四以上同於五之中是能渙其私黨以上同於大君
故曰元吉渙有丘者渙其小羣以聚於九五而成大
羣蓋至是則天下定于一矣故曰匪夷所思文王伐
崇作豐而四方之諸侯莫不來同詩云王功伊濯維
豐之恒四方攸同王后維翰此之謂也九五得六四
來同君臣合德以剛中正巽順之道治渙故能渙汗

其大號以誥造邦其居王位也爲稱而无咎正象武
王大誥武成正位爲天王之事故傳曰正位也以釋
渙王居之義曰渙王居者言九五乃渙之君位焉爾
上九以陽居渙極而與下體坎卦相對天下猶有憂
害之未去者也能渙而去之故曰渙其血去逖出无
咎血與逖皆坎象周公去三監之害而誥多士多方
以安天下正渙九上之義也陳友文曰上雖與三應
然超出渙上不爲所染故能渙散其血遠去其害周
公以大義誅管蔡實似之云

